

YOUR EXAMS

Tionndadh Gàidhlig

Am fiosrachadh a dh'fheumas a bhith agad





Na deuchainnean agad

Tha an leabhran seo ag innse nan nithean air am feum fios a bhith agad airson nan deuchainnean agad.

Gheibhear fiosrachadh riatanach ann a dh'fheumas tu leughadh mus suidh thu na deuchainnean agad, fiù 's ged a bhiodh tu air deuchainnean a shuidhe roimhe. Tha e cudromach gun lean thu ris na riaghailtean san stiùireadh seo gus am bi e comasach do gach duine an dìcheall a dhèanamh ann an dòigh a tha cothromach is co-ionann.

Ma tha ceist sam bith agad mu dad san leabhran seo, bruidhinn ris an tidsear no ris an òraidiche agad. Dh'fhaodadh e a bhith feumail cuideachd am fiosrachadh seo a shealltainn ri pàrant no neach-cùraim, agus bruidhinn riutha ma dheidhinn.

Cuimhnich: dèan ullachadh, na bi iomagaineach agus dèan do dhìcheall.

Cuideachd, gheibh thu tòrr fiosrachadh feumail eile aig www.sqa.org.uk/learners

Rèiteachaidhean measaidh

Ma tha ciorram ort no ma tha thu feumach air taic a bharrachd, is dòcha gum bi feum agad air 'rèiteachadh measaidh'. Bu chòir dhut bruidhinn ris an sgoil no a' cholaiste agad ma dheidhinn seo.



Ag ullachadh airson nan deuchainnean agad



Clàr-ama

Chithear clàr-ama nan deuchainnean aig www.sqa.org.uk/timetable

Bu chòir dhut dèanamh cinnteach às amannan nan deuchainnean le bhith a' faighneachd de na tidsearan no òraidichean agad, oir tha cead aig sgoiltean is colaistean atharrachadh beag a dhèanamh air àm tòiseachadh nan deuchainnean.

Dèan cinnteach gu bheil fios agad dè na deuchainnean a tha thu a' dèanamh, càit am bi thu gan dèanamh agus cuin a thòisicheas iad.



Appaichean SQA

Tha appaichean saor an-asgaidh ann gus do chuideachadh aig àm nan deuchainnean.

Leis an app **MyExams**, faodaidh tu clàr-ama pearsanta a chruthachadh agus fhaicinn, notaichean a chur ris, agus 's urrainn dhut a chur ri mìosachain eile.

Tha an app **MyStudyPlan** gad chuideachadh a' riaghladh na h-ùine ionnsachaidh agad le bhith a' cruthachadh plana-ionnsachaidh pearsanta.

A bharrachd air sin, faodaidh tu clàr-ama dheuchainnean pearsanta a chruthachadh a' cleachdadh inneal-cruthachaidh nan clàran-ama air-loidhne.

Gheibh thu tuilleadh fiosrachaidh aig www.sqa.org.uk/studyplan



Ag ullachadh airson nan deuchainnean agad



Seann phàipearan-deuchainn

Faodaidh tu ullachadh airson do dheuchainnean le bhith a' feuchainn phàipearan-ceist bho bhliadhnaichean a dh'fhalbh.

Faodaidh tu an luchdachadh a-nuas, le stiùireadh airson an comharrachadh, bho www.sqa.org.uk/pastpaperinfo

An Scottish Candidate Number agad

'S e an Scottish Candidate Number (SCN) agad an àireamh aithneachaidh phearsanta agad. Bidh na siostaman againn a' cleachdadh an SCN agad airson na tha thu air a choileanadh a chlàradh agus a leantainn.

'S urrainn don sgoil no colaiste agad innse dhut dè an SCN a th' agad. Dèan cinnteach gu bheil fios agad air mus dèan thu na deuchainnean agad. Feumaidh tu an àireamh a sgrìobhadh gu ceart, agus gu soilleir, air na leabhranan-freagairt agad.



Bu chòir dhut sgrìobhadh an fhiosrachaidh agad, a' toirt a-steach an SCN agad, air a' chairt aig cùl an leabhraìn seo. Faodaidh tu a' chairt seo a thoirt a-steach leat don t-seòmar-dheuchainne, ach chan fhaod thu dad sam bith eile a sgrìobhadh oirre.

Ma sgrìobhas tu càil eile air a' chairt, dh'fhaoidte nach leigear leat an deuchainn a shuidhe.

Dèan cinnteach gu bheil am fiosrachadh agad ceart

Gus dèanamh cinnteach gum faigh thu an teisteanas agad air latha nan toraidhean, dèan cinnteach gu bheil am fiosrachadh ceart aig an sgoil no colaiste agad, a' gabhail a-steach d' ainm agus an seòladh ceart agad.

Faodaidh tu coimhead air an fhiosrachadh phearsanta agad le bhith a' logadh a-steach don chunntas MySQA agad. Mura h-eil cunntas agad fhathast, faodaidh tu clàradh airson fear aig www.mysqa.org.uk

Ma dh'atharraicheas am fiosrachadh pearsanta agad, no ma tha iad a' dol a dh'atharrachadh tron t-samhradh, feumaidh tu innse don sgoil no don cholaiste agad mus crìochnaich thu airson làithean-saora an t-samhraidh.

Am fiosrachadh agad

Bidh sinn a' cruinneachadh fiosrachaidh mud dheidhinn bhon sgoil no colaiste agad agus bhon ùghdarras ionadail. Bidh sinn cuideachd a' cruinneachadh fiosrachaidh bho na leabhlanan-fhreagairt deuchainne agad agus stuthan measaidh eile.

Buinidh am fiosrachadh seo uile ri do theisteanasan agus bidh sinn ga chleachdadh airson:

- cùisean a chur air dòigh dhut airson deuchainnean agus measaidhean SQA a dhèanamh
- Barantas Theisteanasan na h-Alba a dhuaiseachadh dhut agus a chur thugad
- seirbheisean a tha thu air iarraidh a libhrigeadh, leithid MySQA
- na ceistean agad a fhreagairt
- cùisean far a bheil amharas mu dhroch ghiùlain a rannsachadh.

Bidh sinn ga chleachdadh cuideachd air adhbharan staitistearachd is rannsachaidh.

Is dòcha gun sgaoil sinn cuid den fhiosrachadh agad do bhuidhnean eile, a' gabhail a-steach Riaghaltas na h-Alba, UCAS, no an sgoil no colaiste agad, agus buidhnean eile a bhios a' libhrigeadh nan seirbheisean againn. Gheibh thu tuilleadh a-mach mun dòigh anns am bi sinn a' cleachdadh an fhiosrachaidh agad aig **www.sqa.org.uk/privacystatement**

Faodaidh tu lethbhreac iarraidh den fhiosrachadh a th' againn mud dheidhinn. Faigh a-mach ciamar a nì thu seo aig **www.sqa.org.uk/requestpersonalinformation**





Air latha na deuchainne



A' nochdadh airson na deuchainne agad

Bu chòir dhut a bhith ann taobh a-muigh an t-seòmair-dheuchainn co-dhiù 10 mionaidean ron àm a bu chòir don deuchainn tòiseachadh. Ma bhios tu fadalach, feumaidh tu innse don tidsear no don òraidiche a tha os cionn dheuchainnean SQA. Innsidh iadsan dhut a bheil cead agad an deuchainn a shuidhe.

Dè thachras ma dh'èireas rudeigin ris nach robh dùil agus gu bheil buaidh aig sin air mo choileanadh air an latha, no nach urrainn dhomh an deuchainn a shuidhe?

Bu chòir dhut fhèin no don phàrant no don neach-cùraim agad fios a leigeil leis an sgoil no colaiste cho luath 's a ghabhas.

Thèid aca air bruidhinn riut mu na roghainnean agad agus a bheil còir agad a bhith air do mheasadh ann an 'suidheachaidhean fìor neo-àbhaisteach'. Airson seo a thachairt, dh'fheumadh an sgoil no colaiste agad iarrtas a chur thugainn. Feumaidh seo a bhith taobh a-staigh 10 latha às dèidh na deuchainne agus, air an adhbhar sin, tha e air leth cudromach gum bruidhinn thu riutha cho luath 's as urrainn dhut.

Rudan toirmisgte

Is e rudan toirmisgte rudan nach fhaod a bhith agad aig an deasg agad san t-seòmar-dheuchainne, mura deach an ceadachadh leinne mar phàirt de rèiteachadh measaidh.

Am measg nan rudan toirmisgte, tha na leanas:



Fòn-làimhe



Innealan eileagtronaigeach leithid iPod, tablaid, uaireadair tapaidh no inneal sam bith eile a cheanglas ris an eadar-lìon no a thaisgeas fiosrachadh



Leabhraichean, notaichean, sgeidsichean no pàipear, a' toirt a-steach rud sam bith sgrìobhte air d' aodach no air do chorp



Cèis pheansailean/cèis àireamhair



Àireamhair - ach a-mhàin ann an deuchainnean sònraichte



Faclair - ach a-mhàin ann an deuchainnean sònraichte

Mus tèid thu don t-suidheachan agad san t-seòmar-dheuchainne, feuch gun seall thu nad phòcaidean agus nad bhaga a dhèanamh cinnteach nach eil gin de na rudan sin agad. Chan fheum thu rud toirmisgte sam bith a thoirt leat don t-suidheachan agad. Bu chòir dhut ullachadh ro-làimh agus na rudan sin fhàgail ann an àite sàbhailte.

Nuair a tha rudan àraidh ceadaichte ann an deuchainn, feumaidh tu dèanamh cinnteach gu bheil iad a rèir riaghailtean SQA. Faodaidh an tidsear no an t-òraidiche agad comhairle a bharrachd a thoirt dhut mu dheidhinn seo. Feumaidh tu dèanamh cinnteach nach eil na rudan a' leigeil leat fiosrachadh toirmisgte fhaotainn. Chan fhaod thu uidheam sam bith a chom-pàirteachadh ann an deuchainn.



Air latha na deuchainne

Deasgaichean

Anns a' mhòr-chuid de sgoiltean no colaistean, thèid àireamh deasga no suidheachain a thoirt dhut airson gach deuchainn. Dèan cinnteach gu bheil fios agad air an àireamh sin mus tòisich an deuchainn.

Freiceadain

Canar 'freiceadain' ris na daoine a bhios a' cumail sùil air na deuchainnean agad. 'S e an obair acasan dèanamh cinnteach gun tèid na deuchainnean agad a chumail a rèir nan riaghailtean agus gu bheil na riaghailtean air an cur an sàs ann an dòigh chothromach. Feumaidh tu èisteachd ri stiùireadh sam bith a bheir freiceadain dhut agus a leantainn.

Ma thachras rudeigin dhut ris nach robh dùil agad fhad 's a tha an deuchainn a' dol air adhart, leithid gun tòisich thu a' faireachdainn tinn, bu chòir dhut innse don fhreiceadan sa bhad.





Cothromachd

Bu chòir Cothrom na Fèinne a bhith aig a h-uile duine an dicheall a dhèanamh ann an deuchainnean. Tha dèanamh foill no adhbharachadh ùpraid ann an deuchainn mì-chothromach do luchd-tagraidh eile. Am measg nan eisimpleirean de fhoill is giùlan mì-chothromach (droch chleachdadh neach-tagraidh) tha na leanas:

- Stuthan toirmisgte a bhith agad aig an t-suidheachan agad san t-seòmar-dheuchainne.
- A' leigeil ort gur e neach eile a th' annad san deuchainn no a' leigeil le neach eile an deuchainn a shuidhe dhut.
- Giùlan buaireasach san t-seòmar-dheuchainne.
- A' cleachdadh cainnt no ìomhaighean mì-mhodhail, ana-cainnteach, oilbheumach no leth-bhreitheach nad leabhranan-freagairt.
- A' dèanamh lethbhreac de dh'obair tagraiche eile.
- Co-obrachadh cealgach — ag obair còmhla ri tagraichean eile air obair a bu chòir dhut a dhèanamh leat fhèin.
- Mèirle-sgrìobhaidh — gun a bhith a' comharrachadh stòran fiosrachaidh gu ceart agus/no a' cur a-steach obair neach eile mar gum b' e an obair agad fhèin a bh' ann.

Dh'fhaodadh fìor dhroch bhuil a bhith air na toraidhean agad no air na tha romhad do bheatha ri teachd ma bhios tu ri foill no giùlan mì-chothromach. Dh'fhaodadh seo toirt a-steach call chomharra, comharra nas ìsle a bhith agad no cur dheth an teisteanais agad uile gu lèir. Faodaidh an sgoil no colaiste agad barrachd a mhìneachadh mu dheidhinn seo.



Pàipearan-cheistean is leabhranan-freagairt

Tha e cudromach gun leugh thu an stiùireadh air aghaidh a' phàipeir-cheistean agad agus gun dèan thu cinnteach gu bheil an cuspair is ìre ceart.

Ann an cuid de dheuchainnean, gheibh thu pàipear-cheistean agus leabhran-freagairt fa leth. Feumaidh tu am fiosrachadh pearsanta agad a sgrìobhadh gu soilleir air duilleag aghaidh a' phàipeir-cheistean no an leabhra-fhreagairt. Ma chleachdas tu duilleagan pàipeir a bharrachd, cuimhnich an t-ainm agad, an Scottish Candidate Number (SCN) agad, agus ainm na sgoile no na colaiste agad a sgrìobhadh air gach duilleag agus cuir iad sin am broinn an leabhra-fhreagairt agad.

Ma tha feum agad air tuilleadh pàipeir, bu chòir dhut do làmh a thogail agus iarraidh air an fhreiceadan. Le cuid de chuspairean, gheibh thu tuilleadh dhuilleagan no pàipear graf aig deireadh an leabhra-fhreagairt.

Obraich tron phàipear gus am faic thu na faclan CRÌOCH A' PHÀIPEIR (END OF QUESTION PAPER). Cha bhi dad eile a dh'fheumas tu freagairt às dèidh sin.

Ann am pàipear-cheistean, bidh DUILLEAG BHÀN (BLANK PAGE) sgrìobhte air duilleag sam bith air nach eil ceistean no stiùireadh idir. Cha bu chòir duilleag sam bith a bhith gu tur bàn. Ma lorgas tu duilleag a tha gu tur bàn mus fhaic thu na faclan CRÌOCH A' PHÀIPEIR (END OF PAPER), innis don fhreiceadan ma dheidhinn.





A' sgrìobhadh nam freagairtean agad

Feumaidh tu peann a chleachdadh le inc dubh no gorm. Na cleachd pinn gel, oir faodaidh an sgrìobhadh fàs fann thar ùine leotha sin.

Tha e cudromach gun sgrìobh thu gu soilleir. Nì an luchd-comharrachaidh an dìcheall gus an obair agad a leughadh, ach dh'fhaodadh nach urrainn dhaibh comharran a thoirt dhut ma tha an sgrìobhadh agad doirbh a leughadh. Nuair a sgrìobhas tu air duilleagan air nach eil loidhnichean, feuch gum fàg thu mu 1 cheudameatair eadar na loidhnichean agad.

Ann an cuid de chuspairean faodaidh tu comharran a chall airson mhearachdan ann an litreachadh is puingeachadh cuideachd. Ma tha iomagain ort mu seo, no mun làmh-sgrìobhadh agad, bu chòir dhut bruidhinn ris an tidsear no òraidiche agad.

Ma tha thu air barrachd air aon oidhirp a dhèanamh air ceist a fhreagairt, cuimhnich loidhne a chur tro obair-phròbhaidh no freagairtean a tha thu ag iarraidh a dhubhadh às.

A' fàgail an t-seòmair-dheuchainne

Ma chrìochnaicheas tu tràth no ma tha thu air nas urrainn dhut a dhèanamh san deuchainn, faodaidh tu cead iarraidh bhon fhreiceadan an seòmair-dheuchainne fhàgail, le bhith a' togail do làimhe. 'S dòcha gun toir am freiceadan cead dhut fàgail às dèidh 30 mionaid, ma tha an deuchainn nas fhaide na uair a thìde. Ma tha an deuchainn nas lugha na uair a thìde, feumaidh tu fuireach san t-seòmair-dheuchainne gus deireadh na deuchainne.

Mus fàg thu, feumaidh tu an leabhran-freagairt is am pàipear-cheistean agad, agus leabhranan-dàta sam bith, a thoirt don fhreiceadan. Mura toir thu an leabhran-freagairt don fhreiceadan mus fàg thu an seòmair-dheuchainne, dh'fhaodadh tu comharran a' phàipeir sin a chall uile gu lèir.

EXAM ROOM

ENTER

Na toraidhean agad



A' faighinn nan toraidhean agad

Gheibh thu an teisteanas agad air Dimàirt 6 Lùnastal.

Cuideachd, gheibh an sgoil no a' cholaiste agad na toraidhean agad. Ma tha thu air tagradh gu oilthigh no colaiste, a bhios a' cleachdadh na Universities and Colleges Admissions Service (UCAS), gheibh iadsan na toraidhean agad cuideachd.

Mura faigh thu an teisteanas agad air Dimàirt 6 Lùnastal, bu chòir dhut fios a chur chun na sgoile no colaiste agad anns a' bhad. Innsidh iadsan dhut dè na toraidhean a fhuair thu, agus obraichidh iad còmhla rinne gus faighinn a-mach dè thachair don teisteanas agad.

MySQA

Tha MySQA a' toirt cothrom tèarainte dhut na toraidhean agad fhaicinn air-loidhne. Faodaidh tu cuideachd clàradh gus na toraidhean agad fhaighinn ann an teachdaireachd teacsa no ann am post-d bho 8m Dimàirt 6 Lùnastal. Gheibh thu an teisteanas pàipeir agad tron phost fhathast ge-tà.

Gus na toraidhean agad fhaighinn ann an teachdaireachd teacsa no post-d, feumaidh tu clàradh aig **www.mysqa.org.uk** ro 5f air 16 Iuchar, agus feumaidh tu an cunntas agad a chur an gnìomh ro 5f air 17 Iuchar.

Cuimhnich, ma dh'atharraicheas tu an àireamh fòn-làimhe agad no an seòladh puist-d às dèidh dhut clàradh le MySQA, feumaidh tu am fiosrachadh agad atharrachadh gus am faigh thu teacsa no post-d.





Taic

Tha bhidiothan feumail ann, airson an teisteanas agad a mhìneachadh. Faodaidh tu coimhead orra aig **www.sqa.org.uk/certificate**

Gheibhear freagairtean airson nan ceistean as cumanta aig **www.sqa.org.uk/faqs**



Faodaidh tu fios a chur thugainn le bhith a' lìonadh foirm ceiste tagraiche air-loidhne aig **www.sqa.org.uk/candidateenquiryform**

Thèid aig ar Loidhne Comhairle Luchd-tagraidh air ceistean a fhreagairt mun teisteanas agad bho Dhimàirt 6 Lùnastal gu Dihaoine 9 Lùnastal. 'S e 0345 279 1000 an àireamh.



Results Services

Tha na Results Services againn ann gus do chuideachadh:

- tro àm nan deuchainnean, ma thug suidheachadh neo-àbhaisteach droch bhuaidh air do choileanadh, leithid cuideigin a' bàsachadh no droch thinneas
- às dèidh latha nan toraidhean, ma tha dragh ann mu na toraidhean agad.

Mura tuig thu an teisteanas agad no ma tha thu a' smaoineachadh gu bheil rudeigin ceàrr air, cuir fios chun na sgoile agad no gu roinn chlàran nan oileanach aig a' cholaiste agad.

Dè mura h-eil an comharradh air a' phàipear agam a' coimhead ceart?

Bu chòir dhut bruidhinn ma dheidhinn an dragha agad ris an sgoil no colaiste anns a' bhad. Ma tha iad a' saoil sinn gur mathaid nach eil an comharradh agad ceart, faodaidh iad iarraidh oirnn sgrùdadh a dhèanamh air an obair agad. Faodar prìomhachas a chur air an ath-sgrùdadh ma tha feum agad air toradh gus àite a ghleidheadh ann an oilthigh no colaiste.

Bheir an sgoil no colaiste agad làn fhiosrachadh dhut mu na Results Services againn. Gheibh thu tuilleadh fiosrachaidh cuideachd bho **www.sqa.org.uk/resultsservices**

CUIMHNICH

✓	Nochd ann an deagh àm – co-dhiù 10 mionaidean mus tòisich an deuchainn.
✓	Thoir leat an stuth ceart – pinn le inc dubh no gorm msaa.
✓	Dèan cinnteach nach eil rudan toirmisgte agad aig an t-suidheachan agad.
✓	Dèan cinnteach gun d' fhuair thu am pàipear-deuchainn ceart.
✓	Sgrìobh d' ainm, an SCN agus ainm na sgoile no na colaiste agad air gach pìos obrach a bheir thu seachad (a' gabhail a-steach leabhranan-freagairt agus duilleagan-freagairt a bharrachd).
✓	Sgrìobh gu soilleir.
✓	Leugh an stiùireadh gu lèir agus èist gu cùramach airson fiosrachadh a bharrachd bhon fhreiceadan.
✓	Cuir loidhne tro obair-phròbhaidh sam bith nach eil na pàirt den fhreagairt agad.
✓	Fuirich san rùm gus am bi an deuchainn seachad. Chan fhaod thu fàgail tràth ach le cead an fhreiceadain.

✗	Na toir rudan toirmisgte don t-suidheachan agad.
✗	Na bi gad ghiùlan fhèin gu buairesach agus na adhbharaich ùpraid.
✗	Na copraig bho dhuine eile.
✗	Na co-roinn d' obair le duine sam bith eile.
✗	Na co-roinn an uidheamachd agad le duine sam bith eile.
✗	Na cleachd cainnt no ìomhaighean mì-mhodhail, ana-cainnteach, oilbheumach no leth-bhreitheach sna freagairtean agad.

Feuch gun srac thu dheth a' chairt Scottish Candidate Number agad



SCN CARD



Centre Name

Your Name

Date of Birth

Scottish Candidate Number

Important notes:

- Write your centre name, your name, date of birth and SCN on the card.
- If there is any unauthorised information found on the card it could result in your exam entry being cancelled.
- Immediately tell your school or college about any change to your permanent home address.
- You cannot get a replacement card if this one is lost or damaged.



Ionad Conaltraidh Luchd-cleachdaidh

Fòn: 0345 279 1000

Làrach-lìn: www.sqa.org.uk

BD7900 Gearran 2019